

NOGOMETNI SAVEZ FEDERACIJE BiH
IZVRŠNI ODBOR NS F BiH

PROPOZICIJE
takmičenja Omladinske lige BiH
za takmičarsku 2016/2017 godinu

Sarajevo, juni/lipanj 2016.g.

Broj: 531/16
Sarajevo: 29.06.2016.

Izvršni odbor Nogometnog saveza Federacije Bosne i Hercegovine, na osnovu Statuta Nogometnog saveza Federacije Bosne i Hercegovine i člana 4. Pravilnika o nogometnim takmičenjima NS/FS BiH, na sjednici održanoj 29.06.2016. godine, donosi s l j e d e ć e:

PROPOZICIJE
takmičenja Omladinske lige BiH
za takmičarsku 2016/2017 godinu

OPŠTE ODREDBE:

Član 1.

Omladinsko prvenstvo juniora i kadeta Bosne i Hercegovine za takmičarsku 2016/2017 godinu u drugom stepenu takmičenja/natjecanja BiH odvijace se u okviru omladinske lige Bosne i Hercegovine podijeljene u četiri grupe: "Sjever", "Zapad", "Centar" i "Jug".

Član 2.

Takmičenje/natjecanje se organizuje u formi jedinstvene lige juniora i kadeta, podijeljene u četiri grupe, po kriteriju geografske povezanosti i ekonomske opravdanosti.

U takmičenju/natjecanju obavezno učestvuju juniorske i kadetske ekipe klubova Prve lige Federacije BiH.

Klubovi Druge lige FBiH, te klubovi Prve i Druge lige Republike Srpske mogu učestvovati prema prijavama za takmičenje.

Na osnovu ukazane potrebe za popunjavanje broja klubova u Omladinskoj ligi BiH mogu učestvovati i klubovi i nižeg stepena takmičenja uz ispunjavanje kriterija: sportskih, infrastrukturnih, finansijskih i drugih.

Ukoliko se otvori prostor za popunjavanje lige u Omladinskoj ligi BiH u cilju razvoja mladih nogometaša, mogu učestvovati i juniori i kadeti klubova Premijer lige BiH sa pravom nastupa godinu dana mlađih igrača.

Svaki klub u takmičenju mora imati kadetski i juniorski tim i nastupiti na svakoj utakmici sa dva navedena tima.

Član 3.

Grupu „Centar“ sačinjavaju klubovi iz FS *Kantona Sarajevo*, NS *Zeničko-Dobojskog kantona*, NS *Srednjobosanskog kantona/županije*, FS *Bosansko-Podrinjskog kantona* i PFS *Istočno Sarajevo*.

Grupu „Jug“ sačinjavaju klubovi iz NS *Hercegovačko-Neretvanskog kantona/županije*, ŽNS *Županije Hercegbosanske*, ŽNS *Zapadnohercegovačkog* i PFS *Trebinje*.

Grupu „Sjever“ sačinjavaju klubovi iz NS *Posavske županije*, NS *Tuzlanskog kantona*, PFS *Bijeljina* i PFS *Doboj*.

Grupu „Zapad“ sačinjavaju klubovi iz NS *Unsko-Sanskog kantona*, PFS *Banja Luka*, PFS *Prijedor* i PFS *Gradiška*.

NAČIN ODIGRAVANJA TAKMIČENJA:

Član 4.

Omladinska liga BiH grupa „Jug“ broji 15 klubova, a takmičenje se odigrava po dvostrukom bod sistemu i vremenski utvrđenom kalendaru sa dvije takmičarske/natjecateljske polusezone jesen i proljeće.

Omladinska liga BiH grupa „Centar“ broji 19/20 klubova, raspoređenih u dvije grupe prema regionalnoj podjeljenosti. Takmičenje se odigrava po trostrukom bod sistemu i vremenski utvrđenom kalendaru sa dvije takmičarske/natjecateljske polusezone jesen i proljeće, a prvaci dvije grupe razigravat će za prvaka Omladinske lige BiH grupa „Centar“.

Prvi dio:

U prvom dijelu takmičenje Omladinske lige BiH grupa „Centar“ se odvija dvokružno, a igrat će se 18 kola (9 + 9 = 18) – domaćin gost, a raspored utakmica se određuje žrijebom takmičarskih brojeva uz primjenu Bergerove tablice.

Drugi dio:

U drugom dijelu takmičenje Druge lige FBiH se odvija jednokružno, a igra se 9 kola. Klubovi dobivaju takmičarske brojeve na osnovu plasmana nakon prvog dijela (18 kola) i to na sljedeći način:

- klubovi plasirani od 1. do 5. mjesta dobivaju identičan takmičarski broj; prvoplasirani broj 1, drugoplasirani broj 2, trećeplasirani broj 3, četvrtoplasirani broj 4 i petoplasirani broj 5.
- klubovi plasirani od 5. do 10. mjesta dobivaju takmičarske brojeve na sljedeći način: šestoplasirani klub broj 10, sedmoplasirani klub broj 9, osmoplasirani klub broj 8, devetoplasirani klub broj 7 i desetoplasirani klub broj 6.
- u slučaju da klubovi nakon prvog dijela sezone imaju isti broj bodova plasman na tabeli se utvrđuje na osnovu rezultata koje su u međusobnim susretima ostvarile ekipe sa jednakim brojem bodova s tim što pogodak u gostima vrijedi dvostruko.
- Ukoliko je riječ o tri ili više ekipa koje imaju jednak broj bodova bit će formirana dodatna mini tabela sa međusobnim rezultatim tih ekipa.

UKOVOĐENJE TAKMIČENJEM:**Član 5.**

Izvođenje takmičenja u grupama Omladinske lige BiH biće ustupljeno entiteskim savezima, koji će rukovoditi takmičenjem putem organa koje imenuju entitetski savezi. Omladinskom ligom grupa „Centar“ i grupa „Jug“ u takmičarskoj 2016/2017 godini rukovodit će NS Federacije BiH, a Omladinskom ligom grupa „Sjever“ i grupa „Zapad“ rukovodiće FS Republike Srpske.

Entitetski savezi ne mogu ustupati vođenje takmičenja grupa Omladinske lige BiH kantonalnim, županijskim, odnosno, područnim savezima.

Član 6.

Takmičenje/natjecanje u Omladinskoj ligi BiH grupa „Centar“ i „Jug“ administrativno se vodi kroz COMET informacioni sistem.

Na stadionu treba biti posebna prostorija za sastavljanje zapisnika. Na stadionima klubova za utakmice Omladinske lige u službenom prostoru za zapisnik, klub domaćin treba da obezbijedi:

-ispravan kompjuter sa štampačem i ispravnom internet konekcijom za potrebe COMET informacionog sistema.

-ispravnu telefonsku liniju i telefaks.

Član 7.

Komisiju za rukovođenje takmičenjem/natjecanjem čini komesar takmičenja, komesar za određivanje sudija, disciplinski sudija i tehnički sekretar, koje će imenovati entitetski savezi.

U Omladinskoj ligi grupa „Centar“ i „Jug“, komesar takmičenja, disciplinski sudija i tehnički sekretar su iz NS Federacije BiH, a komesar za sudije iz FS Republike Srpske.

U Omladinskoj ligi grupa „Sjever“ i „Zapad“, komesar takmičenja, disciplinski sudija i tehnički sekretar su iz FS Republike Srpske, a komesar za sudije iz NS Federacije BiH.

Član 8.

Kotizaciju u iznosu od 1.200,00 (hiljadudvjestotine) KM, kojom se finansira rad organa koji u procesu takmičenja/natjecanja razmatraju pitanja takmičenja/natjecanja i donose odluke u

vezi sa takmičenjem/natjecanjem, kao i izvršavanje administrativno-tehničkih poslova, klubovi će uplaćivati entitetskim savezima, koji rukovode takmičenjem u grupama Omladinske lige.

Klubovi su obavezni prvi dio kotizacije u iznosu od 600 KM i godišnju pretplatu za bilten (100 KM) uplatiti 15 dana prije početka prvenstva, a drugi dio u iznosu od 600 KM 15 dana prije početka drugog dijela prvenstva. Klubovi koji u predviđenom roku ne izvrše uplatu kotizacije ne mogu početi takmičenje/natjecanje.

Troškove kotizacije za takmičenje snosit će klubovi Omladinske lige BiH ili će uplatu izvršiti NS/FS BiH kao pomoć klubovima Omladinske lige BiH grupa Sjever, Centar, Zapad i Jug, te će u tom slučaju klubovi Omladinske lige BiH biti oslobođeni plaćanja kotizacije.

RASPORED I TRAJANJE UTAKMICA:

Član 9.

Raspored utakmica određuje se žrijebom koji se obavlja prije početka prvenstva.

Juniorske i kadetske ekipe igraju utakmice u istom danu i u istom mjestu. Klubovi su obavezni u roku od 15 dana prije prvenstva dostaviti podatke o mjestu (stadionu) odigravanja utakmica na kojima su domaćini.

Izmjena vremena i mjesta odigravanja utakmica može se vršiti sedam dana prije odigravanja utakmice, a nakon tog roka izmjena se može vršiti samo u slučaju opravdanog razloga, odlukom organa koji rukovodi takmičenjem.

Utakmice juniorske lige igraju se 2x45 minuta, a utakmice kadetske lige igraju se 2x40 minuta. Odmor traje od 10 do 15 minuta.

SUDIJE I DELEGATI:

Član 10.

Nadležni organi određuju sudije i delegate sa liste sudija i delegata, Prve i Druge lige NS FBiH i Prve i Druge lige FS RS, Sekretarijata takmičenja, a izuzetno i Premijer lige BiH vodeći računa o udaljenosti mjesta odigravanja utakmice i troškovima službenih lica.

Službenim licima pripadaju sljedeće naknade:

Za obavljanje službene dužnosti delegata, sudije i sudije asistenta na utakmicama Omladinske lige BiH- grupa „Centar“ i „Jug“ po nalogu NS Federacije BiH, utvrđuju se ukupni troškovi od 300 KM. Troškovi se isplaćuju odmah nakon utakmice.

Klub koji ni 24 sata nakon odigrane utakmice ne izvrši isplatu pripadajućih troškova službenih lica, automatski je suspendovan i sve do izmirenja finansijske obaveze ne može igrati zvanične utakmice, a zbog zanemarivanja obaveza bit će disciplinski sankcioniran novčanom kaznom od 100 KM.

U slučaju da utakmica nije odigrana iz razloga za koji službena lica ne snose krivicu, pripada im dnevnica i putni troškovi a delegatu i taksa.

Član 11.

Delegat utakmice zapisnik i izvještaj sa utakmice dostavlja kroz COMET sistem. Po završetku utakmice zapisnik sa utakmice sastavljen putem COMET informacionog sistema, sravnjavaju delegat i sudac, nakon čega delegat zaključuje izvještaj fair-playa, a sudac utakmice svojom šifrom zaključuje zapisnik sa utakmice.

Delegat utakmice je obavezan u roku od 24 sata po odigranoj utakmici ili najkasnije prvi radni dan do 11:00 sati, u COMET informacionom sistemu zaključiti delegatski izvještaj.

IGRALIŠTE:

Član 12.

Utakmice Omladinske lige NS/FS BiH kadeta i juniora igraju se na glavnim terenima klubova ili na travnatim igralištima, koja u svemu moraju odgovarati propisima Pravila nogometne igre i Pravidnika o nogometnim natjecanjima NS/FS BiH uz odobrenje nadležnog organa NS FBiH. Stadion mora imati obezbijeđene četiri svlačionice (po dvije za domaću i gostujuću

ekipu), sa posebnom svlačionicom za sudije, prostorijom za sastavljanje zapisnika, kao i kabinama za rezervne igrače i stručna rukovodstva i posebnom kabinom za delegate.

ORGANIZACIJA UTAKMICA:

Član 13.

Mjere obezbjeđenja

Organizaciju utakmica vrše klubovi domaćini, koji su obavezni obezbijediti sve uslove u skladu sa važećim propisima. Klub domaćin je obavezan poduzeti sve potrebne mjere za sigurnost sudaca, delegata i gostujućeg tima, za vrijeme odigravanja utakmice i sve do napuštanja igrališta-stadiona odgovarajućim prevoznim sredstvom.

Zastave

Klub domaćin obavezan je na jarbole postaviti Državnu zastavu BiH i zastavu NS/FS BiH. Na jarbolima mogu biti entitetske zastave, zastave kantona/županija, klupske zastave i zastave fair-playa. Postavljanje drugih zastava nije dozvoljeno. Istaknute zastave trebaju biti istih dimenzija.

Medicinska služba

Klub domaćin obavezan je na svim utakmicama osigurati ljekarsku službu i vozilo hitne medicinske pomoći, koje mora biti uz igralište i u slučaju potrebe obaviti prijevoz do zdravstvene ustanove.

Ukoliko vozilo prve pomoći ne dođu na igralište do početka utakmice, ista neće započeti sve dok klub ne osigura prikladno i obilježeno osobno vozilo kojim će se, u slučaju potrebe, ozlijeđeni prevesti do najbliže zdravstvene ustanove.

Klub domaćin dužan je da osigura za cijelo vrijeme trajanja utakmica kadeta i juniora prisustvo dežurnog licenciranog ljekara ili fizioterapeuta sa odgovarajućom medicinskom opremom.

Osiguranje utakmice

Klub domaćin obavezan je izvršiti najavu utakmice kod nadležne policijske uprave i zatražiti policijsko obezbjeđenje te se blagovremeno pobrinuti da na utakmicama juniora i kadeta budu prisutni pripadnici policije.

Klub domaćin obavezan je osigurati redarsku službu sa komesarom za bezbjednost.

Klub domaćin obavezan je osigurati dovoljan broj skupljača lopti propisno odjevenih.

Utakmica se neće igrati bez prisustva pripadnika policije, sanitetskog vozila i licenciranog medicinskog ljekara ili fizioterapeuta, te organizovane redarske službe. U slučaju neispunjavanja prethodno navedenih uslova iz takmičenja, sve posljedice snosi klub domaćin.

Lopte za igru

Za odigravanje prvenstvenih utakmica domaćin je dužan osigurati najmanje tri lopte za svaku od utakmica, a u slučaju da na igralištu nema skupljača lopti, domaćin je obavezan obezbijediti šest lopti.

Odgovornost kluba domaćina

Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.

Za propuste u organizaciji utakmice klubovi će snositi takmičarske i disciplinske posljedice prema važećim propisima NS FBiH i NS/FS BiH.

PROMJENA TERMINA UTAKMICA:

Član 14.

Promjena termina odigravanja utakmice može se vršiti na osnovu podnesenog pismenog zahtjeva zainteresiranog kluba, koji mora biti podnesen komesaru za takmičenje/natjecanje, najkasnije osam (8) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina utakmice s priloženom dokumentacijom iz koje

se može utvrditi opravdanost podnesenog zahtjeva sa eventualnim prijedlogom za novi termin odigravanja utakmice.

U slučaju kada zahtjev za promjenu termina nije podnesen u skladu sa prethodnim stavom, komesar za takmičenje/natjecanje može promijeniti termin utakmice samo ukoliko je klub koji traži promjenu termina dostavio i pismenu saglasnost drugog kluba, što je moguće najkasnije tri (3) dana prije utvrđenog termina utakmice.

Kada se utakmica odlaže zbog bolesti igrača (trovanja i slično), to se može učiniti ukoliko je bolesno najmanje 7 (sedam) standardnih igrača (igrači koji su odigrali najmanje 70% utakmica) u toku tekućeg jesenjeg ili proljetnog dijela prvenstva.

Kada komesar za takmičenje dobije pismeni zahtjev kluba za odgodu utakmice zbog bolesti igrača sa kompletnom validnom medicinskom dokumentacijom iz odgovarajuće medicinske ustanove (uredan, čitljiv i tiskan elektronski nalaz nadležnog specijaliste, dijagnoza, mišljenje o dužini bolovanja i sl.), donijet će odluku o odgodi utakmice, uz mogućnost traženja mišljenja od Komisije za sportsku medicinu NS FBiH.

Kada je došlo promjene termina utakmice, komesar za takmičenje će donijeti odluku da se ona odigra u prvom slobodnom terminu (ako su prestali razlozi zbog koje je utakmica odgođena), pod uslovom da svaki klub ima najmanje dva slobodna dana između odigravanja dvije utakmice.

IGRAČI I TIMOVI:

Član 15.

Klub je obavezan za kadetski i za juniorski tim u NS Federacije BiH 15 dana prije početka prvenstva dostaviti spisak igrača, a potrebno je da svaki kadetski i juniorski tim prije početka prvenstva ima najmanje 18 prijavljenih u NS FBiH i uredno registriranih igrača.

Klub je obavezan na svakoj utakmici nastupiti sa dva tima: kadetima i juniorima.

Nenastupanje sa jednim od navedenih timova, tretirat će se kao da klub nije nastupio u tom kolu, sa predviđenom odgovornošću kluba i isključenja iz takmičenja u slučaju nenastupanja na dvije utakmice shodno odredbama Pravilnika o nogomentim takmičenjima NS/FS BiH.

U slučaju neopravdanog nenastupanja na utakmici klub će snositi takmičarske i disciplinske posljedice u skladu sa odredbama Pravilnika o nogomentim takmičenjima i Disciplinskog pravilnika.

PRAVO NASTUPA I ZAMJENE IGRAČA:

Član 16.

Pravo nastupa na utakmicama juniorske lige u takmičarskoj 2016/2017 godini imaju igrači rođeni **01.01.1998.** godine i mlađi, ali ne mlađi od 16 godina.

Pravo nastupa na utakmicama kadetske lige u takmičarskoj 2016/2017 godini imaju igrači rođeni **01.01.2000.** godine i mlađi, ali ne mlađi od 14 godina.

Ukoliko u ligi nastupaju kadetski i juniorski timovi klubova Premijer lige BiH pravo nastupa imaju: Juniori rođeni 01.01.1999. godine i mlađi, kadeti 01.01.2001. godine i mlađi.

Izuzetno mogu nastupiti i igrači koji su godinu dana mlađi od naznačenih godina, ukoliko su na osnovu specijalnog ljekarskog pregleda proglašeni sposobnim za nastupe na tim utakmicama, pod uslovom da je to i uvedeno u igračkoj legitimaciji.

Tokom utakmice može se izvršiti zamjena najviše pet igrača.

Na utakmici može nastupiti samo igrač sa validnim ljekarskim pregledom koji je upisan u igračku legitimaciju, sa validnim datumom, pečatom zdravstvene ustanove i ljekara.

Ljekarski pregled važi šest mjeseci a za igrače mlađe od 17 godina četiri mjeseca. Izuzetno, igrač može nastupiti sa potvrdom o izvršenom ljekarskom pregledu ali samo za tu utakmicu.

Delegat igraču bez validnog ljekarskog pregleda neće dozvoliti da nastupi.

IDENTITET IGRAČA:

Član 17.

Identitet igrača utvrđuje se na osnovu sportske legitimacije NS/FS BiH ili ličnih isprava (lična karta, pasoš). U slučaju utvrđivanja identiteta putem ličnih isprava, delegat je u prvu stranu zapisnika obavezan upisati broj lične karte ili pasoša.

Delegat je obavezan prije početka svake utakmice izvršiti identifikaciju igrača na način što će izvršiti upoređivanje fotografije na igračkoj legitimaciji, sa likom igrača, kao i broj dresa sa zapisnikom utakmice.

Ukoliko se identitet utvrđuje na osnovu ličnih isprava, a protivnički klub najavi žalbu, klub je obavezan komesaru za takmičenje dostaviti sportsku legitimaciju u roku od 48 sati po odigranoj utakmici.

Član 18.

Klubovi su obavezni voditi evidenciju opomenutih igrača, te evidenciju isključenih igrača te po potrebi tačnost evidencije provjeriti u Sekretarijatu za takmičenje.

U slučaju nastupa igrača pod suspenzijom, takmičarske posljedice će snositi klub, a prema odredbama DP NS/FS BiH, posljedice će snositi klub, igrač i službena osoba kluba koja je suspendovanog igrača stavila u tim.

SLUŽBENE OSOBE KLUBA (TRENERI I DR.):

Član 19.

Svaki klub na utakmicama kadeta i juniora mora obavezno imati akreditiranog službenog predstavnika.

Klub je obavezan da u skladu sa normativima vaspitno-pedagoškog rada i obavezama iz takmičenja, na svakoj utakmici ima dva trenera. Od toga je jedan trener kadetskog tima uz obavezu da se stara o igračima-kadetima, a drugi trener juniorskog tima.

Treneri su obavezni da posjeduju Trenersku takmičarsku akreditaciju Centra za edukaciju kadrova NS/FS BiH, sa odgovarajućim datumom validnosti. Za utakmice Omladinske lige BiH validne su trenerske takmičarske akreditacije PRO, A ili B. C takmičarska akreditacija izdata od strane Centra za edukaciju ne vrijedi za utakmice Omladinske lige BiH.

Klub domaćin mora imati akreditiranog ljekara i fizioterapeuta.

Delegat je obavezan prije početka svake utakmice izvršiti identifikaciju u zapisnik prijavljenih službenih osoba kluba (predstavnik kluba, trener, ljekar, fizioterapeut i komesar za bezbjednost) na način što će izvršiti upoređivanje fotografije na akreditaciji, sa likom osobe.

Delegat neće dozvoliti obavljanje dužnosti službenoj osobi (predstavnik kluba, trener, ljekar, fizioterapeut i komesar za bezbjednost) koja nema validnu akreditaciju.

Sve službene osobe obavezni su tokom cijele utakmice imati vidno istaknutu takmičarsku akreditaciju.

DRESOVI:

Član 20.

Klubovi moraju poštivati boju sportske opreme kluba protivnika, koje su prije početka prventva prijavljeni u Sekretarijat saveza i objavljena u biltenu NS FBiH.

Timovi na jednoj utakmici ne mogu igrati u istim ili sličnim bojama sportske opreme. U slučaju da se podudara boja opreme kod dva tima dresove će promijeniti domaća (prvoimenovana) ekipa, a delegat utakmice je obavezan prijaviti tim zanemarivanja boje sportske opreme a klub će snositi disciplinsku odgovornost.

Brojevi na dresovima moraju odgovarati onima na popisu igrača u zapisniku o utakmici. Ako su dresovi prugasti ili šareni, brojevi moraju biti na jednojnoj podlozi. Za vrijeme odigravanja utakmice igrači na poleđini dresova moraju imati vidljive brojeve propisane veličine.

Delegat i glavni sudac utakmice na organizacionom sastanku izvršit će provjeru cjelokupne opreme timova i sudaca te odobriti boju sportske opreme za utakmicu.

UTVRĐIVANJE PLASMANA

Član 21.

Plasman klubova utvrđuje se prema odredbama Pravilnika o nogometnim takmičenjima/ natjecanjima Nogometnog/fudbalskog saveza BiH.

Rezultati klubova Premijer lige BiH u toku takmičarske sezone se uračunavaju, a pri formiranju konačne tablice na kraju takmičarske sezone 2016/2017 svi rezultati klubova Premijer lige BiH bit će brisani te isti nemaju pravo nastupa u utakmicama za prvaka grupe Centar ili Jug te ne mogu nastupiti na finalnom turniru Omladinske lige BiH „Centar“, „Jug“, „Zapad“ i „Sjever“.

Na kraju takmičarske sezone organizirat će se finalni turnir za prvaka Omladinske lige BiH Centar, Zapad, Sjever i Jug na kojem će učestvovati četiri prvaka Omladinske lige BiH, bez mogućnosti učešća klubova Premijer lige BiH.

POPUNJAVANJE LIGE

Član 22.

U takmičarskoj sezoni 2017/2018 ligu će popuniti:

- Klubovi Prve lige FBiH su shodno odlukama IO NS FBiH obavezni učestvovati u takmičenju Omladinske lige BiH grupa „Centar“, „Jug“, „Zapad“ i „Sjever“.

- Klubovi Druge lige FBiH prema prijavama za takmičenje

- Klubovi Prve i Druge lige RS prema prijavama za takmičenje

Lige mogu popunuti i klubovi kantonalnih/županijskih nogometnih liga uzimajući u obzir sljedeće kriterije:

- zbirna tablica iz takmičenja juniora i kadeta iz prethodne takmičarske sezone
- rezultati seniorskog ima iz prethodne takmičarske sezone
- uvjeti infrastrukture i drugo

Ukoliko se otvori prostor za popunjavanje lige u Omladinskoj ligi BiH u cilju razvoja mladih nogometaša, mogu učestvovati i juniori i kadeti klubova Premijer lige BiH sa pravom nastupa godinu dana mlađih igrača, bez mogućnost nastupa na finalnom turniru Omladinske lige BiH.

ŽALBE:

Član 23.

Najave žalbe na odigranu utakmicu u pismenoj formi, dostavlja se u roku od 24 sata po odigranoj utakmici, a žalba sa obrazloženjem i dokazom u uplaćenju taksu dostavlja se u roku od 48 sati po odigranoj utakmici. Ukoliko rok za žalbu ističe u nedjelju ili na državni praznik, rok se produžava za naredna 24 sata.

Žalba se podnosi organu koji rukovodi takmičenjem.

Žalba na odluku rukovodioca takmičenja i odluku disciplinskog sudije podnosi se Apelacionoj komisiji NS FBiH uz uplatu propisane takse.

PRELAZNE I ZAVRŠNE ODREDBE:

Član 24.

Za sve što nije predviđeno ovim Propozicijama, primjenjivat će se Pravilnik o nogometnim/fudbalskim takmičenjima NS/FS BiH, Odluke IO NS FBiH, ostali propisi NS/FS BiH i Pravila nogometne/fudbalske igre.

Član 25.

Propozicije stupaju na snagu danom donošenja a imaju se objaviti u Službenom glasniku NS FBiH.

PREDSJEDNIK

Mato Jozić vr.